

EKALESIA KELISIANO TUVALU



“Faitau Tusi Tapu talo i aso katoa, ke ola koe”



**TE TUSI FAILOTU KAIGA
FEPUALI 2013**

O TE FAKAAOGAGA O TE TUSI FAILOTU I KAIGA.

A te tusi tenei ne fakatoka atu mai loto i te Ulu Ofisa a te Ekalesia Kelisiano Tuvalu mo fesoasoani ki te fakatokaga mo faiga Lotu i Kaiga mo Fakapotopotoga, e pela foki mo lotu 'talo I Asotapu. E se konei fua a mataupu talosia; kae e tuku matala eiloa manafai e isi aka ne isi mataupu e mafaufaugina ke fakapitoa ki ei a te faiga talosaga mo tapuakiga.

KO TE FAKATOKAGA MO MATAUPU TALOSIA.

Ke talosia ne tatou a mataupu konei i te agaga maluga mo te talitonu me i te Atua Tolu Tasi Tapu e fakalogologo mai ki manakoga o o'tou loto takitokotasi e auala i olotou talosaga fai konei:

- Ke mafai o lavea kae fakamaonigina a fuataga o te pulepulega 'lei io me ko te taupulega 'lei i te fakatelega o te Malo.
- Ko takitaki o te Malo ke fai a olotou tulafono mo ikuga fai ki te mea e loto ki ei te Atua.
- Ko sui filifilia ki te Palamene ke mafai o ga'lue fakatasi mo te manuia o te Atufenua.
- Ke mafai o atagina kae fakatalitonugina i te Malo a te tonu o tena fajavae: **'Tuvalu mo te Atua.'**
- Ke mafai o fakaasi I te olaga tautua e se gata mo tino o te Atufenua kae maise te Atua mo tena Ekalesia tapu.
- Ko takitaki o te Atufenua ke mafai o ola i te olaga amiotonu, ava kae matakū ki te Atua.

KO TE MALO O TUVALU.

- Ke tupu olaola a te foitino lavea o Iesu Keliso (tela ko tena Ekalesia) i loto o te Atufenua.
- Ko faifeau ke fakavae tonu a te galuega ki te loto o te Atua, kae se ko mea e 'loto a latou ki ei.
- Ke mafai o tumau a te loto malosī mo te talitonu ki te Alikī te Atua mo ana fakamanuiaga ki a tatou i aso takitasi o te olaga.
- Ko kelisiano katoa ke ola i te olaga talitonu mo te fakamaoni ki te Alikī te Atua i mea katoa.
- Ko te Ekalesia ke folafola a te Tala 'Lei o te fakaolataga a te Atua ki tino katoa.
- Ke fakamalosi o fakataunu a te akoakoga o fanau i Fetuvalu e pela mo te fakamoemoega o te Ekalesia Kelisiano Tuvalu.

KO TE EKALESIA KELISIANO TUVALU.

- Ke tupu ola a te foitino lavea o Iesu Keliso (tela ko tena Ekalesia) i loto o te Atufenua.
- Ko faifeau ke fakavae tonu a te galuega ki te loto o te Atua, kae se ko mea e 'loto a latou ki ei.
- Ke mafai o tumau a te loto malosī mo te talitonu ki te Alikī te Atua mo ana fakamanuiaga ki a tatou ki a tatou i aso takitasi o te olaga.
- Ko kelisiano katoa ke ola i te olaga talitonu mo te fakamoemoe ki te Alikī te Atua i mea katoa.
- Ko te Ekalesia ke folafola a te Tala 'Lei o te Fakaolataga a te Atua ki tino katoa.
- Ke fakamalosi o fakatauna a te akoakoga o fanau i Fetuvalu e pela mo te fakamoemoega o te Ekalesia Kelisiano Tuvalu.
-

KE OLATATOU I TE OLAGA OLAMO NISI

- Ke talo tatou mo nisi kola e fia'kai kae fia inu kit e Munatonu o te Tala 'Lei o te Fakaolataga a te Atua.
- Ke 'talo tatou mo tino puapuaga i te lalolagi, e penei mo tino konei:
- Tama'liki fakaalofa, fafine ko 'mate a olotou avaga, latou kola ko pokotia a olotou olaga ona ko taua, matagi malosia mo nisi fakalavelave tupu fakafuasei i te lalolagi.
- Ko tino seai ne mea'kai mo mea inu, kae ko seai foki ne fale e mafai o faka'malu ki ei, mo latou ei kola e faigata o maua ne galuega fesoasoani ki te tausiga o te olaga.
- Ko tino se katoatoa 'lei a olotou foitino mo olotou mafaufau. Tino fakapuapuagatiagina ona ko pulepulega se 'lei.

KO ASO FAKAMANATU I LOTO I TE ATUFENUA

Kalena a te Ekalesia Kelisiano Tuvalu.

Aso o te Malo.

Aso o Fenua takitasi.

KO FAKAPOTOPOTOGA A TE EKALEZIA KAU FAKATASI.

- CWM, WCC, WARC, PCC, WACC, mo nisi fakapotopotoga.

ASO LIMA 01 FEPUALI

Tusi faitau Loma 12:9-21

Fuaiupu filifilia fuaiupu 21: "Ke se fakatakavale koe ne te masei; kae ke fakatakavale ne koe a te masei ki te lei."

FAI KE TAKAVALE A TE MASEI I TE LEI

Te Atipisopu ko Meritus Desmond Tutu se faifeau e takutakua kae fakaalologina i mafaufau o tino Afelika mo te lalolagi, ona ko ana taumafaiga o fakatakavale a te masei, pela mo te se amanaiagina o lagona o tino malalo, tino mativa mo tino fakaalofa i Afelika ki faiga lei pela mo te galue malosi o atiake kae agai a tulaga o tino katoa konei ki faiga lei i te alofa mo te faimeatonu.

'A te 'lei e malosi atu i te masei. Te alofa e malosi atu i te olaga fai fili. Te mainaga e malosi atu i te pouliga. Te ola e malosi atu i te mate, i te fakaotiga, a te manumalo i o tatou e auala i a la tela ne alofa mai ki a tatou. Konei a pati o tena talo i te fonotaga ne kaufakatasi ki ei a te faifeau tenei, tela e fakamasaua mai ki a tatou me i tino katoa e ola i tulaga kesekese o te olaga, nisi e ola lei a ko nisi e ola fakaalofa.

A te tusi faitau o te aso tenei e fakamasaua mai me se tulaga tonu kae lei mo tatou o fakatakavale a te masei ki te lei. A te talitonuga faka-Kelisiano e se fakavae ki te fai fili, mo te tau i atu o te masei ki te masei, kae fakavae ki te alofa mo te fai meatonu o te Atua. Ke taumafai malosi a tatou i aso nei ke moa e takavale a tatou i te masei kae ke fakatakavale ne koe a te masei ki faiga lei mo te alofa, me e tena a te loto o te Atua mo tatou.

ASO ONO 02 FEPUALI

Tusi faitau Tito 3:1-11

Fuaiupu filifilia vaega o te f5 mo te f7: "ne fakaolagina ne ia, e se pogai mai i galuega lei kola ne fai ne tatou i te amiotonu, kae ne pogai mai i tena alofa nau ... ko te mea ke takuamiotonugina tatou i tena alofa tauanoa, kae fai foki mo suitonu i te fakamoemoega o te ola e se gata mai."

OLA E PELA MO FANAU A TE ATUA

A tatou ne fakaolagina ne Iesu, e se fai pela mene maua ne tatou e auala mai i tou amiotonu; kae ne auala mai i tena alofa nau mo tatou, tena la ko fakamagina tatou i tona alofa, tela ko fai ei tatou mo tama a te Atua i te fakamoemoega o te ola e se gata mai. A te Tusi Tapu e fakaasi manino mai a ata e uke kae taua o te alofa tauanoa o te Atua pela foki mo te lasi o te avanoaga ne tuku mai ki tino katoa ke mafai o salamo kae fakaolagina. E pela mo Iona ne seki talia muamua ne ia a te fekau a te Atua ke fano ki Niveva, e seki salamo a tino Nineva mai olotou agasala. Fakamuli aka ne fano a Ioana ki Nineva, tela ne salamo a tino kae fakaolagina katoa. Te pagota ne faka sataulogina i te feitu fakaatamai o Iesu ne salamo kae ne maua ne ia a te fakaolataga a te Atua, ka ko te sua pagota ne seki maua ne ia.

A te fekau taua mo tatou i te aso nei, ko tatou ke ola e pela mo fanau a te Atua. Ko tona uiga, ko tatou ke talia a te fakaolataga a te Atua tela ne auala i a Iesu kae salamo ki tou agasala. I te faiga tena, ko fai ei tatou mo fanau a te Atua, kae ka folafola atu ne tatou te Tala Lei o te fakaolataga tela ne fakatoka ne Iesu tou Fakaola ki tino katoa.

ASOTAPU 03 FEPUALI

Tusi faitau 2 Kolinito 5:17-21

Fuaiupu filifilia, f18: "A mea katoa konei ne aumai i te Atua, tela ne faka'lei ne ia tatou mo ia e auala ia Keliso, kae ne aumai foki ne ia ki a tatou te galuega o te faka'leiga o tino."

TE KOGA KA KAMATA I EI TATOU

A te olaga fou e kamata i te talia ne koe mo au a Iesu Keliso mo fai a tou fakaola. A te kamataga o te olaga fou mo te fultua ki te masei e kamata i te taimi ko talia ei ne tatou a Keliso Iesu, ke ola kae sasale fakatasi a tatou mo ia. A te fakafouga o tou olaga ne kamata loa ne te Atua, ne faka seai ne ia a te ola faka'keseke o tatou mai i nisi tino talitonu, ne fakapuli ne ia a tou soli tulafono, kae kami ne te Atua a tatou ke soko fakatasi mo ia i te fakatuanaki mo te alofa.

Ki a Paulo, a te Atua e 'fonu i te alofa, tela e manako ko tatou ke faka'lei kae fakafou a tou va mo ia e auala i tou fakatuanaki ki a Iesu Keliso. A te fekau tela e akoako kae fakamasaua mai ki a tatou, i a tatou ko fanau atafai a te Atua. E kamata a olaga fou o tatou i a Iesu Keliso, 'me kafai ko ola a Keliso i loto i se tino, a ia se tino fou'.

ASOGAFUA 04 FEPUALI

Tusi faitau 1 Kolinito 6:1-8

Fuaiupu filifilia vaega fakaoti o te f7: "E a, e masei manafai e fakapuapuatia koutou? E a, e masei foki manafai e kaisoagina otou mea?"

'FULI ATU A TE SUA KALAFAU

A Paulo e fakaasi ake ne ia te masei mo te se gali ko te Kelisiano ke moli ne ia te sua Kelisiano ki te fono tulafono tela te fakamasino i ei se tino se Kelisiano. A te Kelisiano ko te tino fakatuanaki ki a Iesu te Fakaola alofa tela ne fakaasi ne ia 'me ka iloa ne te lalolagi i a koutou ko oku soko manafai e fakatau alofa koutou' (Ioa.13:35). E tenei te ata se gali o Kelisiano i Kolinito tela e fautua ne Paulo ke taumafai o teuteu a olotou fakalavelave io me ko kinauga i tua o te fono tulafono. E fakamalosi ne Paulo ko Kelisiano ke taumafai o fakatoka fakalei a va masei katoa mo tulaga katoa pena kae ke se fakamasani te moli o tena taina Kelisiano ki te fono tulafono. A te fekau taua ko Kelisiano ke fakatau fesoasoani kae fakatau fakamagalo latou me i a latou ne taina talitonu i a Keliso.

A Iesu e se fakamalosi ne ia a tulafono faka-Iutaia tela ko te tau ma sui, e sui a te mata ki te mata, e sui foki te nifo ki te nifo (Mataio 5:39) Kae akoako ne ia a te alofa ki ou fili, fai fakalei ki a latou kola e ita mai ki a koe. Kafai e 'pa ne se tino tou kalafau, toe fuli atu foki te sua fetu. A te Alike e manako ke ola tatou i te agaga o te alofa mo te fakatau fakamagalo me e tena a te iloga o te Kelisiano i aso nei.

ASOLUA 05 FEPUALI

Tusi faitau Iakopo 3:13-18

Fuaiupu 17: "Kae ko te poto mai te lagi, se poto e tulaga muamua i te ma, e filemu foki, e loto malalo, e malie gofie; e fonu foki i te alofa 'nau kae fakatupu foki ne ia a galuega 'lei e uke, e fuafua lei ana mea e fai, e se fakatupu masei foki."

FAKA FOLIGA AKE A TE POTO

A tusi faitau e fakataua ne ia te poto faka te lagi me lavea i ei a tusaga lei kae aoga mo te olaga o tatou i aso nei. Konei a nisi uiga taua o ia:

- **E ma** (pure, holy and clean) Te poto tenei e fakatoka ne ia te olaga ke ma mai uiga kola e se fetau mo te olaga tonu faka Kelisiano. “A koutou ke ma e pela mo te tou Tamana i te lagi e ma.” (Lev.11:44-45,1Pet.1:16)
- **E filemu:** te poto faka te lagi e fesoasoani o fakatoka te olaga ko tino ke ola filemu kae fakataualofa. “Amutia a latou kola e fakatupu te filemu me ka fai a latou mo tama a te Atua.” (Mat.5:9)
- **E loto malalo:** Te loto tela e fakataua ne ia a mea lei katoa kae fakapau ne ia a tino katoa. “Amutia a latou kola e loto malalo: me fai mo latou a folafolaga a te Atua (Mat.5:5)
- **E malie gofie:** E se loto makeke, e loto fiafia o fakamalie a tulaga kesekese kola e faite i ei te lei
- **E fonu i te alofa nau:** E loto fiafia o faka seai a mea see kae fakamagalo a latou kola e see mai ki a ia, kae fakamalosi faeloa ne ia te fakatau alofa
- **E fakatupu ne ia a galuega lei io me ko fuataga lei:** Te olaga ko fai mo fakaakoakoga lei ki tino katoa i ona tafa i ana muna mo faiga. A fuataga lei io me ko galuega lei e lavea i tena olaga alofa, filemu, atamai, lotomalalo, se kaisano mo te loto fiafia
- **Fuafua lei ana mea e fai:** Se faka kesekese ne ia a tino kae fai a te meatonu ki tino katoa. Ana ikuga mo faiga e se fakase ne manakoga o tena loto, te fia fai tulaga io me ko te falei.
- **E se fakatupu masei (without hypocrisy):** E se taumafai o fai pela mo te mea tela e se iloa ne ia. E fakatino ne ia tena olaga tonu kae galue fakamaoni mo te vikiga o te Atua

Te feku taua mo tatou, ke taumafai a tatou o fakafoliga io me fakatino a te poto faka te lagi i tou olaga i aso nei

ASOTOLU 06 FEPUALI

Tusi faitau 1 Petelu 4:1-11

Fuaiupu filifilia f8: "Kae sili i mea katoa, ke fakataua 'lofa fakamaoni koutou, me i te alofa e ufi ne ia a te ukega o agasala."

FAKATOKA TONU MO 'TAU MASEI

A Petelu ko talitonu mo te loto katoa me ko pili mai te gataga o te lalolagi (f.7), tenei ko fautua ne ia a Kelisiano salalau ke iloa ne latou o ola agai atu ki tulaga ka oko a te lalolagi ki ei. Sa poi; kae fakatau alofa, fakaasi i faiga a te alofa mo tino katoa. So se meaalofa ne tuku atu ne te Atua ki a koe, fakaaoga i te tavini atu o kotou mo te loto naunau o tautua te Tala Lei a Iesu kae ko vikia i ei a te Atua te Tamana.

Te fakatonuga a Iesu ko toe gaki mai i te gutu o tena soko ko Petelu, “Koutou ke fakatau alofa fakamaoni.” A te gali o te alofa fakamaoni me ufi ne ia te ukega o agasala. Ko tona uiga a te alofa e fakamagalo kae fakapuli ne ia agasala kola ne fai. Te fakamagalo kae fakapuli ne koe o agasala ne fai ne tou tuakoi, ko ufi ne koe ke se toe fakamasausau. Muna Paulo, “*A te alofa e se fakamasausau ne ia a mea se a se tino*” (1Kol.13:5e). Kafai ko oti ne fakamagalo ne koe a tou taina ko tau o fakapuli ne koe ana mea se fai ki a koe. E a e toka koe o fakamagalo kae fakapuli a mea se a tou taina ne fai ki a koe?

ASOFA 07 FEPUALI

Tusi faitau Kolose 3:5-15

Fuaiupu filifilia, f14: "Kae sili i mea katoa konei, taofi mau koutou ki te alofa, tela e fusi fakatasi ei ne ia a mea katoa ke lei."

PEI KI GATU FOU

Te muagana tenei ko fakaulu ki ei te mafaufau fakavae o te tusi faitau, "Pei ki gatu fou" se fakaasiga me i te olaga ka fuli mai te olaga mua ki te olaga fou, mai te olaga fai valevale ki te olaga atafai, mai te olaga fai agasala ki te olaga fakatuanaki ki a Iesu. Tena te manatu fakavae tela ne auala mai i te matua o te aso nei.

A te tino ka pei ki te gatu fou tenei ko te alofa ko tona uiga ka fou te olaga me ko faifaiga lavea i pati mo faiga ko fakavae ki te alofa. Konei a uiga lavea o te olaga pei ki te gatu o te alofa ko te kaimalie, te loto malalo, te agamalu mo te kufaki. Te tusaga tafasili i te gali e lavea i tino kola e ola te alofa i a latou me taumafai faeloa o fusi a mea katoa ki te lei. Ko tona uiga, a te galuega a te alofa i loto i tino, ko te fai o mea katoa kola e mafai ne latou ke le, ke gali kae vikia ei te loto o te Atua.

ASOLIMA 08 FEPUALI

Tusi faitau Efeso 4:17-24

Fuaiupu filifilia vaega o te f24: "E 'tau mo koutou o 'pei ki te foitino fou, tela ne faite i foliga o te Atua i te amiotonu mo te 'malu."

FIAKAI KI AMIOTONU O TE ATUA

A te kai ki te amiotonu o te Atua se tusaga e faigata o oko ki ei a tou olaga i aso nei, vagana fua la e mafai ne tatou o fai a mea konei:

1. Sa ola pela mene tino pouliuli kola e fai ne latou a uiga mo faiga konei, te tuku olotou foitino ki amioga masei, fai o amioga fakatakalia, valea kae loto makeke, loi, kaitaua, kae tuku faeloa o avanoaga ki te Tiapolo ke fai ana faiga masei i tou olaga.
2. Pei ki te foitino fou: A te tino ne faite ne te Atua ki ona foliga tapu kae ne fakamasei a te foitino tena ne te agasala. Iesu ne vau o fai te fakatokaga fou mo fakafou te olaga tela ko masei valevale i te agasala. Te mea e toe nei ko koe mo au ke talia te fakatokaga tenei a Iesu. Ka talia ne koe mo au a Iesu i te fakatuanaki, ko tona uiga ko pei tatou ki te foitino fou tela ne faite ki foliga o te Atua i te amiotonu mo te malu.

Tela la, ko toe fakamasaua mai ki a tatou a te fekau o te aso nei, me ko tau ke tiaki ne tatou a tou uiga mua, ko te fiakai ki mea o te pouliga, kae ke kai a tatou ki meakai o te Tala Lei ko te Muna a te Atua.

ASOONO 09 FEPUALI

Tusi faitau Efeso 4:25-32

Fuaiupu filifilia fuaiupu 29: "Sa faipati ki muna e 'mae ei te loto o te sua tino. Fakaaoga eiloa a pati fesoasoani, ko vaega pati kola e aoga i te puti ake kae maua mai ei foki a mea 'lei, ko te mea ke fua mai au pati ki te 'lei, i tino kola ne fakalogo 'logo ki a koe."

MAFAUFAU FAKALEI KI AU PATI E FAI

Te tusi faitau o te aso nei e fakamasaua mai, me e tau o mafaufau fakalei tatou ki 'tou pati e fai: "Sa faipati ki muna e 'mae ei te loto o te sua tino. Fakaaoga eiloa a pati fesoasoani, ko vaega a pati kola e aoga i te puti ake kae maua mai foki ei a mea 'lei, ko te mea ke fua mai au pati ki te

lei, i tino kola ne fakalogo 'logo ki a koe." A muna kola e faipati ne tatou mo fakaoko a te fekau ki tino e taua, me e fakasalalau io me fakailoa atu ne tatou a te fekau ki nisi tino kola e seki lagona ne latou a te fekau. A te fakatamala o tatou o mafaufau fakalei ki tou pati e fai e mafai o fakafifi io me fulise ne ia a te meatonu.

Te fekau taua mo tatou, ke mafaufau io me filifili fakalei au pati e fai i so se taimi e faipati koe i ei, ko tino kola e fai ki ei te fekau ke maina, ke fiafia, kae ke manako o toe fakalogologo. A te fekau o te Tala 'Lei o te a te fakaolataga a te Atua e auala i a Iesu ka talia gofie ne tino kae ka manako faeloa o fakalogologo ki ei e auala mai i te lei o te folafolaga. A te fakaleiga o va o tino mo sua tino pela foki mo te taumafaiga ko tino ke salamo ka faigofie manafai e fakatoka fakalei a te fekau mo te folafolaga.

ASOTAPU 10 FEPUALI

Tusi faitau Maleko 4:21-25

Fuaiupu filifilia, vaega o te f21: "Kai isi eiloa se tino kai aumai ne ia a te moli ki loto, kae tuku ne ia mai lalo o te tanoa io me mai lalo o te moega?"

TE MAINAGA O TE MEATONU

A Iesu ne fakaaoga ne ia a mea kola e iloa lei ne tino pela mo moli, tanoa, tulaga moli, lakau mo fai ana akoakoga ko tino ke faigofie o maina lei i te fekau tela e taumafai a ia o folafola. E tenei te fekau taua a Iesu ki timo mo ana soko, E seai se tino e tuku ne ia a te moli i lalo o te tanoa io me i lalo o te moega me ka se lavea a tena mainaga. E pena foki a te mainaga o te Munatonu a te Atua tela ne akoako mai ne Iesu ki te lalolagi. E se mafai o maua ne tino a tena aoga mafai e 'funa a te mainaga o te Munatonu a te Atua e pela mese moli i lalo o te moega mo te tanoa. E tau o fakaasi atu te mainaga o te meatonu o Iesu ki te lalolagi.

Muna Iesu ki ona soko (Mat.5:16) *"Ke pena o maina atu a tou mainaga ki mua o tino, ko te mea ke lavea mai ne tino a otou galuega lei, ke viki atu ei latou ki te otou Tamana i te lagi."* Te fekau o te aso nei, ko tou tusaga mo toku tusaga mai i a Iesu, ke folafola atu ne tatou a te mainaga o te Munatonu a te Atua ki tou fanau mo tou tuakoi. Fakamolemole, sa tao ne koe i lalo o te tanoa me i lalo o te moega a te mainaga o te Munatonu a te Atua.

ASOGAFUA 11 FEPUALI

Tusi faitau Efeso 5:15-21

Fuaiupu filifilia f21: "Ke fakalogo te sua tino ki te sua tino ona ko te tou ava mo Keliso."

A IESU KO TE FAKATOKAGA O TE OLAGA

E fakataua ne te Muna a te Atua a te olaga lei kae filemu i va o tauavaga, i ekalesia, kaulotu pela foki mo fakai mo fenua. E fakamaina ne te tusi faitaua a te uiga tenei ko te *fakalogo* mese lakei tafasili i te gali e teuteu ki ei a tou olaga fakatauavaga, mo tou olaga Kelisiano. Te fakalogo se tusaga faigata i nisi taimi ona ko tatou taki tokotasi e nofo foki loa mo tou manakoga mo fiafaiga i loto i te olaga tenei

A Apelaamo e takutakua i loto i tala o tino Epelu ona ko tena fakalogo ki te Atua. E isi foki ne taimi e lavea a te faigata o te fakalogo ki fakatonuga pela mo te fekau ke ave o tena tama e tokotasi ke fai mo taulaga ki te Atua, kae tiga loa te faigata, ne tautali loa a Apelaamo i fakatonuga mo manakoga o te Atua. E tenei te agaga tonu o te fekau mo tatou i aso nei

Te fekau o te aso nei e fai mai me ko tou ava ki a Iesu Keliso e fakamalosi ne ia a tou fakalogo te sua tino ki te sua tino. Ka tulaga maluga a Iesu i tou olaga talitonu, ko faigofie o fakalogo te sua tino ki sua tino. Tela la, talia ake a Iesu mo fai tou fakaola i te aso nei, ola mafuta mo ia i aso katoa, ko faigofie i ei mo tatou o faka tau fakalogo. A Iesu ne fakalogo ki mea katoa ne fai atu a tona Tamana ki a ia ona ko te mafuta fakatasi o laua i taimi katoa.

ASOLUA 12 FEPUALI

Tusi faitau Mataio 4:1-11

Fuaiupu filifilia, fuaiupu 1: "Tena ne 'taki ei ne te Agaga a Iesu ki te toafa ke tofotofo (fakaosooso) ne te Tiapolo."

E SEAI SE LAFIGA

A te toafa se koga e seai ne vaiuke, ne lakau ola lei, ona me vela. Te lasiga o Palesitaina e lavaki me vela malosia kae se ola lei a lakau i ei. A tino kola e faimalaga i loto i koga penei e fakatoka fakalei a meakai mo vai ko latou ke taunu a olotou malaga. E tokouke e afaina a olotou ola i koga lavaki ona ko te seai ne koga lei mo fakalafi mai te vela, te moko, mo manu fekai kola e nofo i koga penei. E penei a te koga ne ave a Iesu ne te Agaga Tapu ki ei ke tofotofo ne te Tiapolo.

A tatou e ola i te koga lavaki tenei ko te lalolagi kae e tofotofo foki loa i ei a tou fakatuanaki mo tou fakalogo ki a Iesu. E seai ne koga mo fakalafi a tatou i konei vagana e masaala i tou mafaufau i a Iesu ko te kaupapa, te olo maluga tela ko tou lafiga i aso nei (Sal.61:4; 91; Mat.11:28). Ke fakapilipili tatou ki a Iesu i taimi o tofotofoga ko te mea ke mafai ne tatou o agai kae teke atu a te fili. Tela la, ko tau ei o fai ne tatou se filifiliga tonu mo tou olaga i aso nei, me e tefea te koga e lafi koe ki ei, ko te Alike io me ko te malosia o Satani? E manakogina ko taua ke kaufakatasi mo Iesu, me ka maua ei ne tatou a te manumalo o Keliso, tela e aumai ne ia a te fakaakoakoga sili mo tou fakalafi.

ASOTOLU 13 FEPUALI

Tusi faitau, Kolose 2:16-19

Fuaiupu filifila, f18a & 19a: "Ke seai se tino e fakaseaoga ne ia koutou, i te fia sili ona ko fakaasiga taua ne maua ne ia mo te loto malalo fakaloiloi mo te ifo ki agelu ... kae se puke mautakitaki ki a Keliso, tela ko te ulu o te foitino".

A KELISO KO TE MEATONU

A tatou Kelisiano o aso nei ko tau o iloa mautinoa ne tatou te katoatoa o tou fakatuanaki mo akoakoga a Iesu Keliso tela ko te Ulu o te Ekalesia. Sa fakatamala o faitau kae tauloto a tena Munatonu kae ola mafuta mo Ia i aso katoa. E tenei loa te auala e faigata i ei mo tino o fakase a tou fakatuanaki ki a Iesu i olotou fakamatalaga e uiga ki meakai mo meainu, io me ko faitu ki aso fakamanatu, mo aso fiafia o te masina sae io me ko te sapatu. A mea konei ko ata fua o mea ka oko mai, ka ko te mea tonu ko Keliso Iesu

I vaitaimi o Paulo ne feagai a ia mo fakalavelave mai i vaega a tino penei kola e fia maluga, kae faite a tulafono faka-te-lotu e se tonu. Ne fakavae a olotou tulafono ki mafaufauga mo kiloga ki uiga faka-te-tagata kola ko te fia sili mo te se amanaia a nisi tino; kae e se kilo tonu ki a Iesu Keliso. Se akoakoga mo tatou Kelisiano i aso nei, ke masaua faeloa ne tatou me ia Iesu Keliso ko ia ko te meatonu io me ko te tina mea tela ne aumai ne te Atua ko te mea ke fai a ia mo Ulu o te Ekalesia, tela ko tou fakaola e iloa e tokotasi.

ASOFA 14 FEPUALI

Tusi faitau Teutelonome 8:1-5

Fuaiupu filifilia 2a: “Masaua a te ‘takina a koutou ne te Aliko te otou Atua, i te malaga loa a koutou i loto i te vao o tausaga e fa sefulu konei ko teka.”

NE FAGAI KAE ‘TAKIGINA

Te malaga a Isalaelu mai Aikupito ki Kanana se malaga loa kae e uke a fakalavelave mo fuifaiga ne fakafeagai mo latou. Ne muimui a te kaumalaga ona ko te faigata o te malaga, te likiliki mo te fiainu, mo te se tau o latou ki meakai te lagi (Numela 21:5).

I aso nei, a Kelisiano ne tino faimalaga i loto i toafa o te olaga nei, kae e uke kae kese foki a fakalavelave e feagai mo tatou. Ko oti ne tauloto ne Kelisiano i tala o Isalaelu me se aoga ke muimui a tatou ki te Atua mo tulaga faigata konei e feagai mo tatou. E lua a kiloaga e taua ke maina tatou i ei ona ko faigata konei e feagai mo tatou: Tasi, a tatou e feagai mo fakalavelave kola ne fai ne tatou pela mo te kati ne tatou a lakau i tafatai ko kaina ei te laukele, te ligi o vailakau malosi mo oela (oil) ki tai ko mate io me muu ei a ika, io me ko mea ne fai i atiakega a malo lasi o te lalolagi ko fakamafua ne ia te fanake o te vela, mo te tai fanake. Te sua vaega o fakalavelave e feagai mo tatou, ko mea kola e tupu kae e se oko ki ei tou malosi o fai ki ei se faiga ke se tupu pela mo mafuie, galu (tsunami) mo nisi mea ake foki. Ne akoako mai ne tala o te malaga mai Aikopito ki Kanana me i te mea sili ko te fakana i te loto fakatuanaki ki te takitakiga alofa a te Atua i aso nei. Te alofa fakasoa o te Aliko e maua ne tatou manafai e galue malosi a tatou. *Fakaeke katoa ki luga i a ia a mea e manavase ei koutou, me atafai mai eiloa ki a koutou. (1Pet.5:7).*

ASOLIMA 15 FEPUALI

Tusi faitau, Salamo 91

Fuaiupu filifilia vaega o te fuaiupu 15: “Kafai e kalaga mai latou kia au, ka tali atu au ki la latou, kafai e puapuaga latou ko au ka fesoasoani atu kia latou.

ALOFA, PUIPUI KAE ATAFAI

I te faitau o te aso tenei, e fakaasi mai ne te fai Salamo me i te Atua e alofa, e puipui, kae atafai foki ki a tatou. I te faitau e 2, “A koe ko toku lafiga mo toku puiga, koe ko toku Atua e fakatuanaki au ki ei.” Ko tena uiga, te Atua ko te koga e tasi e maua ei ne tatou te filemu mo te tokagamalie i loto i taimi o fuifaiga o te olaga. Masaua me i te olaga tenei ese se olaga faigofie kae se olaga e fetau faeloa tatou mo faigataga, fakaosoosoga a te fili ko Satani. Masaua la ia Iesu ne saele foki i auala konei, kae ne manumalo a Ia ke oko foki eiloa ki te fakaotiga. Tela la, tatou Kelisiano e tau foki o saele i auala o te tou Aliko ko Iesu. E ui eiloa i te faigata, kae e lagona faeloa te leo o te tou Aliko e fai mai, “Ka fakasao ne au a koe, ka puipui ne au a koe, au foki e fakatasi mo koe, kae atafai foki ki a koe, ka fakaasi atu foki ki a koe a te fakaolataga.”

ASOONO 16 FEPUALI

Tusi faitau Teutelonome 6:13-19

Fuaiupu filifilia , vaega o te fuaiupu 15: “Me i te Aliko te otou Atua tenei e nofo tasi mo koutou e se fiafia ke tapuaki koutou ki nisi Atua fakatea.”

TE FOITINO E MAFAI O TAU KISE MEA MANAFAI E FAKAMASANI KI EI

Se mea e taua ke iloa ne tatou me kafai ko leva te mafutaga o se tauavaga, ka mafai o lavea ne tatou a la uiga ka mafai o pau kae tasi. Te pogai me ko lavea ne laua te taua o te la vasia tela ne fakamasani laua ki ei, ko fai foki ei laua mo tokolua e fakatau alofa i loto i te la mafutaga

fakatauavaga. Ko tonu ei te ulu o te aso tenei me i te foitino e mafai o tau kise mea manafai e fakamasani kiei.

E tenei foki loa te agaga o te tusi faitau o te aso tenei, ko tatou ke fakamasani ki te Atua, me i te Aliko te Atua e se manako ko tatou ke fakamasani io me tapuaki ki nisi Atua. Tela la, ke tapuaki tatou ki te Atua e tokotasi, e maua ei se toe fuliga fou ki te olaga tela ne aumai ne te Atua tela ne faite ne Ia tatou ki ona foliga tapu, ke fai foki tatou mo tino e fai mea lei i o tou olaga kae alofa o fai a mea e loto ki ei te Atua kae fakamasani ki a Ia i aso katoa o tou olaga.

ASOTAPU 17 FEPUALI

Tusi faitau Salamo 64:1-10

Fuaiupu filifilia: vaega o te fuaiupu 6: "A te loto mo te mafaufau o te tino, ne mea e iloa gata"

KO TE ALIKI TOKOTASI E LAVEA NE IA FUAFUAGA A TINO AMIO MASEI

Te olaga tenei e se faigofie, e uke a fakaosoosoga, faigataga mo maega e fetau faeloa mo tatou i aso takitasi. I nisi taimi a taugaso mo tino kola e nofo fakatasi mo tatou ko fai foki mo fakalavelave ki te olaga, e auala i uiga mo faifaiga masei e fai ne latou ko pokotia foki ei te olaga. E tenei tonu te tulaga ne oko ki ei a te fai salamo i tena talo ne faitau tatou ki ei i te aso tenei.

A te fai salamo e talitonu me seai sena malosio o fakatakavale a fakalavelave konei, kae na ko te Aliko tokotasi me e lavea ne Ia a fuafuaga a tino amio masei. Ko te Aliko foki e sao ei a ia mai i fuafuaga masei a tino amio masei. Te fekau mo tatou i aso nei: E tiga loa te se mafai ne tatou o iloa a mafaufau mo loto o tino ka ko te Aliko ese mafai ne Ia o tuku tiakina a tatou ke fakalofa. E fakasao faeloa ne Ia tino kola e fiafia a Ia ki ei, kae fai tena fakamasinoga tonu (f 7-9). Masaua ia tatou ese mafai o fakalofa manafai tatou e talitonu kae piki mau faeloa ki te Aliko ko Iesu Keliso i aso katoa e ola ei tatou.

ASOGAFUA 18 FEPUALI

Tusi faitau Maleko 10:32-34

Fuaiupu filifilia, vaega o te fuaiupu 32: "Ne ave ne Iesu ona soko keatea mo te auala, kae faipati atu ki a latou e uiga mo mea ka tupu ki a Ia."

NE OFO KAE MATAKU

E tenei te tolu o taimi ne fakamasaua ne Iesu ki ona soko a tulaga tafasili i te faigata kola ka saele ne ia ke oko loa ki tena mate. Te fakalavelave a ona soko e seki malamalama loa e uiga mo muna konei e fai sale ne Iesu ki a latou, tela ne oko ei latou ki te tulaga o te ofo mo te matakou i taimi nei. A soko ne ofo me sea te pogai ka mate ei a Iesu, kae ne matakou i a latou ma tiakina ne ia ko seai ei se olotou takitaki. Ne matakou foki a latou i a latou ma fetau mo fakalavelave mo tulaga faigata e uke.

Te fekau taua mo tatou ke pela a tatou mo soko o Iesu, tiga loa te matakou mo te loto pole o latou i faigataga e uke, kae ne tautali loa a latou i a Iesu. A Iesu ko tou Aliko mo tou Fakaola kae e iloa lei ne ia a tou vaivaiga, e tena te mea e se tuku tiaki ne ia tatou kae kami mai ne ia tatou, "Aumai ki au koutou katou kola e mafa otou amoga, kae ka avatu ne au ki a koutou a te malologa" (Mat.11:28). Te Atufenua alala mai i te aso nei, sa ofo kae matakou, kae na olo nei ki te kamiga o koutou mai i a Iesu.

ASOLUA 19 FEPUALI

Tusi faitau Salamo 7:1-17

Fuaiupu filifilia, vaega o te fuaiupu 10: "A te Atua ko toku puiga"

FAKATUMAU A VIKIGA O TE ATUA

A te fai Salamo e manako ki te fakaolataga a te Aliko, ko ia ke fakasao mai i aofaga masei a tino amio masei. Ne tagi foki a ia ki te Aliko me kafai ne fai ne ia ne mea se kise tino, ko tau la o paku ki luga ia ia te fakasalaga. Mai mea katoa konei ne manako ki ei te fai salamo kae e lavea ne tatou me ne takapili a ona lagona mo ona mafaufauga i ana muna tavae kae fakafetai ki te Aliko e tusa mo tena fai mea tonu (f.17)

‘A te Atua ko toku puiga’, konei a muna tavae a te fai Salamo e fakaasi i ei a tusaga gali kae lei e fai ne te Atua ki a latou kola e manako ke fai a ia mo olotou fakaola. I te sua kiloga, ‘a te Atua ko toku puiga’ se takutonuga o te loto ko talitonu mo te loto mautinoa i tona malu lei mai te fili mo tusaga masei o te olaga e auala mai i te pui malosi ko te Atua. E mafai foki o kilo a tatou ki ei mese muna fakapelofeta ko valo kae fakailoa ki te lalolagi ke iloa ne tatou katoa i te Atua ko tou puiga, tela e malu lei ei a so se tino tela e manako o fakamalu i ei.

ASOTOLU 20 FEPAULI

Tusi faitau Salamo 22:12-20

Fuaiupu filifilia, fuaiupu 19: "Toku Aliko, sa fakamao mo au! fakavave mai o fakasao au!"

TIAKINA TE LOTO FAKAVAIVAI

“Toku Atua, toku Atua, kaia ko tiaki mai au ne koe?” (f.1). Te fakatomuaga o te Salamo tenei, pela foki mo te vaega tela ko fai mo tusi faitau, e pei mai ne ia se ata manino o te Kelisiano i aso nei tela ko takasese i te mafa, te faigata, mo te fuifai o te olaga ona ko tulaga konei: tulaga tausene ki mea a te lotu pela mo taulaga, meaalofo ki faifeau, mo tautino mo te falesa fou, ko tamaliki akoga, tusaga faka fenua, ko tautino ki fafine o tena avaga mo manakoga o kaiga mai te fenua tonu. Konei a fakalavelave kola e fakamafua ne ia te lotovaivai kae ko fai ei ona manatu i te Atua ko tiakina ne i a ia.

Kafai ko lavea ne tatou a tou taina ko loto vaivai ona ko te mafa, te faigata mo te logosala o te olaga tautua ki te galuega a Iesu i tou Atufenua, sa fakaseke i sua faitu pela mo te faitaulaga io me fano faka mao ki sua faitu pela mo te tagata mai te matakaiga o Levi (Luka 10:25-35). A soko o Iesu io me ko Kelisiano i aso nei ko ‘Samalia Alofa’ kola e tau o punou ki lalo o fai a tusaga alofa mo latou konei ko loto vaivai. Ke galue fakatasi tatou o faka tau fesoasoani kae fakatau faka malosi te sua tino ki sua tino i te agaga o te alofa mo te tavini atu ki tou Aliko ko Iesu.

ASOFA 21 FEPUALI

Tusi faitau Salamo 140:1-11

Fuaiupu filifilia, vaega o te fuaiupu e 10: "Fakato ifo ki a latou a fatu ka."

ALOFA KI OU FILI

E isi se tagata poto i te mataupu silisili ne faipati e uiga mo te mataupu ko te loto fakamagalo, kae ne fakafesili ne se tino fakalogologo mea e mafai ne koe o fakaakoi a se tino tela e takutakua i te fai o te masei? Ne tali mai ne te tagata tena me e se mafai ne ia, kae ona ko ia se tino ko oti ne talia ne ia a Iesu Keliso, ko tau ei mo ia o fakamagalo kae alofa ki tino tena. Ao se tulaga

faigata kii mo se tino o fakamagalo se tino ko 'se mai io me ko tona fili, ona eiloa ko te natula vaivai o te tagata. I te Salamo e lavea atu me tenei foki te tulaga ne oko ki ei a te fai Salamo, i ana muna ne fai ki te Aliko, fakato ifo ki a latou (ona fili) a fatu ka, ke 'to latou ki se lua, kae se toe mafai o olo ake (f10). Konei a lagona o te fai salamo ne nofo mo ia, ona eiloa ko puapuaga ne fakafeagai mo ia.

E mata e mafai o fakamagalo ne tatou a tou fili? A Iesu ne akoako ne ia a tino i tena lauga i te mauga, me tonu loa mene fai mai penei i aso mua, ke alofa a tatou ki tou tuakoi kae takalialia ki otou fili. Ne fakasoko te faipatiga a Iesu, "*Kae fai atu au ki a koutou ke alofa atu koutou ki otou fili, talo foki mo latou kola e fakasaua mai ki a koutou, ko te mea ke fai koutou mo tama a te otou Tamana tela i te lagi*" (Mat.5:43-45a). E faigofie mo tatou o fakamagalo a tou fili kae alofa ki a latou manafai ko talia ne tatou a Iesu Keliso mo tou loto katoatoa. Talia te fesoasoani o te Agaga Tapu, me ko e aumai ne ia te fakamalosiaga mo te loto tela e fiafia o fakamagalo a tou fili, kae ola fakatasi mo latou, i te alofa tauanao o te tou Aliko ko Iesu Keliso.

ASOLIMA 22 FEPUALI

Tusi faitau Mika 7:1-7

Fuaiupu filifilia, fuaiupu 7: "Ka ko au ko fakatalitali ki te Aliko, ko fakatalitali au mo te loto talitonu ki te Atua tela ka fakasao ne ia au."

KO TE TALI A MIKA

A te lauga a te toeaina i te Falekaupule e penei, "A te olaga i Tuvalu i aso nei ko oko loa te kese mo te olaga i aso o matou. A faiga a tupulaga mo tamaliki fatoa tupu ake ko oko loa te faka fanoanoa kae fakamae loto. Ko oti loa ne ofa ne tupulaga o aso nei te loto talitonu, tu mao aga tapu a tou Atufenua kola e iloa ei te malu o faifai i loto i kaiga, te malu o toeaina mo tau matua o te fenua, te fakaaloalo o tino ki olotou kaiga kae maise ki tulaga taua o te fenua. Te loi mo amioaga faitogafiti o te loto kaimanako ko lavea fakalei loa i faifaiga kola ko tu i ei a tau taina mo tau tuagane i fono tulafono. Te ata tenei e pau mo faifaiga kola ne fakaasi ne Mika ne tupu i Isalaelu i ona taimi, *a fili o te tino ko tino eiloa o tena kaiga* (f.6e).

"Au ka kilo ki te Aliko, muna te pelofeta, au ka fakatali mo te loto talitonu ko te Aliko ka vau o fakasao au." E fakatino ne tatou te fakaasiga a Mika tenei i te loto talitonu mo te fakamaoni i tou olaga tapuaki kae mafuta mo Iesu i tou talosaga, te faitau kae tauloto a tena Munatonu, kae folafola foki ne tatou a tou fakatuanaki ki a Iesu mo tena fakaolataga ki tou tuakoi. Te ata ko fakaasi ne tatou i tou faiga lavea i tou olaga, ko te molimau ola tena i a tatou e talitonu mo te loto katoa me i te Aliko e vau tonu loa o fakasao a tatou.

ASOONO 23 FEPUALI

Tusi faitau Tagiga a Ielemia 2:4-9

Fuaiupu filifilia, vaega o te fuaiupu 5: "Ne fakatonu mai ana matasana ki a matou, e pela a ia me se fili o matou."

KO LOGOMAE TAUAVE

E fakamatala i loto i te tusi ko Tagiga a Ielemia ko logomae tauave o mea tupu ki a Isalaelu i te pukega fakapagota ne Papelonia. Se ata tafasili i te fakaalofa e fakaasi i muna a te pelofeta i tona tagi fanoanoa mo te loto logomae, me pela ko lavea alialimai, kae ko tukufakasau mai ke lavea ne te lalolagi katou te ata manino, i a Isalaelu ko tiakina ne te Atua. I te (f.5), e fai mai i te Atua ko pela me se fili o Isalaelu. Ne fakaaoga ne te Atua a nisi fenua e pela mo Asulia mo fai ana

mea tau malosi e fakaasi atu ei tena kaitaua ki tena fenua ko Isalaelu (Isaia 10:5). Ne ofa liki a Isalaelu ne malo i ona tafa, tona faletapu mo pui malosi o Ielusalema ne maofa kae matoli ki lalo.

I loto i tulaga faigata mo te fakamataku ne oko ki a Isalaeli, tiga foki te loa a tulaga fuifai konei ko paepaeaki i i loto i te olaga, te fakamoemoega e ola i loto mo agaga o latou kola e tausii mau ki te fakatuanaki me ka toe fai ne te Atua se fakatokaga fou, ka toe fakafoki mai ne ia a ona tino ki te fenua kae ka fakasao ne ia a latou. Te olaga o tatou e pena, a Iesu ko te fakamoemoega o tatou i loto i te olaga tenei, sa mataku io me manava se i mea konei e tupu i tou tafa. Sai ke mau tou sulu kae puke mautakitaki ki tou fakaola ko Iesu, me fakasao loa ne ia a koe mo au.

ASOTAPU 24 FEPUALI

Tusi faitau Epelu 12:1-4

Fuaiupu filifilia, fuaiupu e 4: "Me i te otou fekikiga mo te agasala, e seki taua eiloa koutou ke oko ki te okoga tela ko te mate."

KE TUMAU TE TOU KILO KI A IESU

Te olaga tautali i a Iesu Keliso ne fakatusa ne Paulo ki tino tafao i tafaoga fakataufai i te olaga faka-e-agaga, kola e tele ke maua ne latou a te fualiki o ola. A te tagata tafao e fakataputapu a tona olaga mai i mea kola e fakalavelave kae fakamafa ne ia a tona olaga tafao. E pena foki te olaga faka te agaga e fakataputapu a tona olaga ko te mea ke se siga vave i fakaosoosoga, ke se loto vaivai kae fakapalapala, ke se fakase vave a tona loto ne fiafaiga o te olaga. Ko vaega vaivaiga konei e mafua i ei te se fai o tusaga fakamoemogina o te olaga faka te agaga.

Ke tumau te tou kilo ki a Iesu i te fakatau telega tenei, ko se mafai ei o siga tatou i fakaosoosoga, ko se loto vaivai kae fakapalapala foki, i a tatou e siomia ne tino talitonu i tou fakatautelega tenei. Muna Iesu i a ia ka fakatasi mai faeloa ke oko eiloa ki te gataga (Mat.28:20e). Ona la a Iesu e fakatasi mo tatou i te fakatautelga tenei, ko tau mo tatou o loto malosi kae loto faikimua ke oko loa ki te ikuga. Tumau te kilo ki a Iesu tela kooti ne tele i te fakatautelega faka-te-agaga tenei kae ne manumalo. E manumalo foki tatou mana tumau te tou kilo ki a Iesu, me ko ia tokotasi ko te auala tonu o tatou i aso nei.

ASOGAFUA 25 FEPUALI

Tusi faitau Salamo 6

Fuaiupu filifilia, vaega o te f.2 mo te f.3: "Te Alikii, alofa mai ki a au, i a au ko vaivai. Tokuu agaga katoa ko oko loa i toku fanoanoa."

TE ALIKI FAKASAO MAI TOKU AGAGA

I loto i te Tusi Tapu, e kesekese a ata o te Atua e lavea ne tatou i fakamatala a tusii tala. Te Salamo tenei e fakatusa ne ia te Atua ki se Alikii pule kaitaua, tela e fakasala ne ia ana tavini, ona ko uiga se kae masei o latou. Te tavini ne fakatagi ki te pule mo se fakamagaloga, ona ko ia ko oko loa i te 'mae kae ko vaivai foki. Te tavini ne seki manako ko ia ke mate, kae ne manako ko ia ke ola, tela ne manatua ne ia o kalaga ki te Alikii mo te loto talitonu me ka fakamagalo kae fakaso ne i a ia. I te fakaotiga o mea katoa konei, ne masaua loa ne te tavini o avatu a vikiga mo tavaega o te Alikii ona ko tena alofa fakamagalo.

E uke a fakaosoosoga masei mo mea faigata kola ka fai mo fakalavelave ki tou auala fia oko atu ki te Atua, kae e tau loa mo tatou o fakamalosi, me ui eiloa te faigata, fuifai, kae mafa te olaga e

oko tatou ki ei, kae ke se puli i a tatou a tou Atua o talosaga ki a ia ke maua ne tatou se fakatoka alofa mo tou olaga fakafegai mo vaivaiga o te olaga kae faimalaga tatou i loto i te olaga tavini kae tautua ne tatou a ia.

ASOLUA 26 FEPUALI

Tusi faitau Salamo 102:1-11

Fuaiupu filifilia, fuaiupu 11: "A toku olaga e fakatusa ki te malu o te afiafi, e pela au mo mouku magemage."

I KOGA LAUKELE SE AOGA.

Setaumate ko oti ne oko ifo ki a tatou a te logomae o te fai pela me tino ko tiakina, ko se alofagia, ko seai foki loa ne tino e fia kaufakatasi atu. E fakaala ne ia te logomae o te loto i loto loa, kae maise la ko lagona o te se taulia mo te se manakogina. A te ganta o te taimi tena ko fai mai i muna penei: `A toku olaga ko pela mese au o te afi; Au ko pela mese mouku ko magemage,ko manava fita kae ko galo a tena manako ki meakai . I te (f.7) ko mafuli ana muna, me ko fakatusa ne ia a ia ki se manu eva o te vai tela ka eva atu ki te koga lavaki. A ia e pela foki mese lulu e se maua o sala ne ana meakai, e pela foki mese manu eva e tu fakaalofa ise tuafale o se fale.

Te kiloga taua tela e fakamasaua mai ki a tatou me kafai e galo a te Aliko i tou olaga, e pau a tatou mese laukele se aoga tela e 'se mafai eiloa o ola se lakau aoga i ei. E se gata i te se aoga o te olaga, ka ko tatou kafai mo fakalavelave ki te olaga o tino talitonu mo te galuega o te Tala Lei. Tela la, sa nofonofo fua mo tou olaga pau pela mese laukele se aoga kae talia a Iesu tela ko te vai o te ola ke inu kae fakasusu ki ei a tou olaga, ko aoga i ei a koe i tou kaiga , te fenua mo te Galuega a te Aliko ko Iesu .

ASOTOLU 27 FEPUALI

Tusi faitau Iopu 6:1-13

Fuaiupu filifilia, vaega o te fuaiupu e 4: "A te Atua malosi ne 'velo ne ia au ki matasana."

KO SEAI, NA KO PUAPUAGA

Te tulaga ne oko ki ei a Iopu e fakamaeloto kae se gali. A mea ne tupu fakavave kae soko foki loa ki ana tamaliki, ana tavini, mo ana manu fagai e masei kii, kae fakapatonu ne tatou mese mea tonu tela e pokotia i ei a tino i aso nei. E isi se talitonu me tau loa ne te tino a mea e toki ne ia, e lei manafai loa pena. Kae kafai la e se pena, setioa o logomae mae malosi te loto o Iopu. A tatou e maina me isi loa ne tino kafai ko pakia io me fanoanoa, e masani loa o nofo filemu kae e 'se faipati, a ko Iopu e kese, me i a ia ne pakalaga mo te ita ona ko te tulaga o te mae ko oko ki a ia.

E fakamuna ne Iopu i ona puapuaga e se mafai o fuagina ki se fua, kae maise te poisini o matasana ko salalau i tena foitino (f10). Ko faigata i a ia o maua se filemu i tena fakafeagai mo te olaga tenei. E tasi te mea ne fakataua ne Iopu ko tena tulaga mafuta mo te Atua. Ana muna, "E seki teke eiloa ne au se fakatonuga a ia." A mea konei ne tupu ki a Iopu e mafai foki o pokotia i ei tou olaga tavini. Kafai a te Atua ko fai mo fili o tatou kae se ko tou fakaola, ko tona uiga ka feagai faeloa a tatou mo fakalavelave.

Fuaiupu filifilia, vaega o te fuaiupu 22: "Ea e seai ne vailakau i Kileata?"

LOFOMAE O TE LOTO MO ONA TINO

Te pogai o te mae o te lotu o Ieemia pela foki mo tena fanoanoa lasi ona loa ko agasala a tona fenua i mua o te Atua, kae tiga loa te tulaga tena, a Ieemia ne kaufakatasi mo tino o tena fenua i lotu i olotou puapuaga mo logomaega. Ne lagona foki ne Ieemia te fanoanoa ona ko te se tali mai o te Atua ki te tagi atu o latou mo se fesoasoani. Muna Ieemia, "E mata a mea konei ne pakiaga o te foitino io me ne pakiaga o te Agaga? A toku fanoanoa e se mafai o gata, au ko masaki i te lotu (f.18). A pakiaga faka-te-foitino e masani o fakalei i Kileata i te mea e uke a vaega lakau e ola i ei, kae kaia la kopenei ei matou? Ko seai nei ne vailakau i Kileata?" Ko vaega kiloga kesekeke konei, ne oko ifo ei ki a Ieemia te fanoanoa, tela ne taumafai foki a ia ke tiaki a ona tino, ona ko latou ko fai mo tino e teke ki te Atua, kae fai foki ne latou a uiga kola e se fiafia ki ei a ia.

A te Alike ko Iesu Keliso ne numutaki i lotu i vaega fakalavelave penei mo nisi tulaga faigata, kae ne maluga atu a tena alofa mo tino konei ko pokotia, kae ne manako malosi i tona lotu o kau fakatasi mo latou. A Iesu e alofa ki tino pokotia ne te fakalavelave lasi kola e fanau mai ne te olaga ola i lotu i te agasala, kae ne fai foki ne ia a galuega fakafoofgia mo fakaola kae fakasao a latou katoa ko te mea ke mafai ne latou o toe foki ki te Atua. Ne kalagagina kae ne tofi ne Iesu a ona soko mo te ekalesia ke tauave ne latou a te galuega mo te tusaga tenei, 'o folafola ki tino katoa i te Atua e alofa ki a latou kae manako o fakaola a latou e auala i a Iesu'.